

中國近代文學叢書

散原精舍詩文集

增訂本

中

陳三立 著

李開軍 校點

上海古籍出版社

中國近代文學叢書

上海古籍出版社

散原精舍詩文集

增訂本

中

陳三立 著
李開軍 校點

溪行

門前衣帶水，歲晚一相尋。
禿樹晴逾衆，遙鐘隔未沈。
茅茨完老眼，沙路澹行吟。
插鬢添峰壑，蒼然夕照深。

次第觀農圃，欹傾齧水涯。
晚菘肥雨露，斷白篆泥沙。
寒卧旌竿影，聲迴粉堞笳。
數錢供菜把，溪上兩三家。

咫尺毘盧寺，牆根老柏存。
祇今烽燧冷，猶接鳥烏喧。
粥鼓翻霜氣，齋廊記唾痕。
經過知換世，醉卒噪禪門。

幽徑煙雲合，誰憐一往情。
安歸虞夏沒，所得笑啼成。
步履迎衰艸，橋梁避晚晴。
枯流鷗鷺去，心死負前盟。

【校記】

〔旌竿〕《小說月報》第六卷第十一號作「旗杆」。

〔老〕《小說月報》作「古」。

觚庵茅亭晚望

四山日落風泠泠，紫霞罩野長煙青。蔽虧林樹暗城郭，光迴一水猶晶熒。拂襟躡履茅亭上，歸棲萬翼啼相向。補綴樓欄星點稀，盪摩霄漢笳聲愴。窮冬魚鼈阻安流，小舸短篷未可傍。爲想橫戈恣殺戮，婦孺呼號投盛漲。眼前創痍少蘇息，江山始覺還清曠。主人隔我葡萄卮，寧倚口舌扶時危。緇塵眯目不能去，微憐梅萼空存枝。萬象沈冥月初白，滿抱悲歡對今夕。手捫鍾阜霜露垂，應出魍魎識歸客。

沈友卿吳仲言邀飲秦淮畫舫

澹日晴煙古渡頭，畫橈期客薦珍羞。三年未顧吳孃曲，一醉餘飛故國愁。短水魚蝦來可數，高雷雁鷺下何求。捲簾不改鍾山色，自笑生還話舊游。

步月

荒城留冷月，白髮步相依。吠犬疎籬接，棲烏獨樹非。霜痕忘南北，野塚立歔歔。回

數逃亡屋，花飛共汝歸。

觀仇涑之同年新築園亭

復成橋畔舊官屋，十載經過一偷目。此來俊侶導我游，已闢小園擁梅竹。短約深池微映帶，飽霜禿樹羅蠹蠹。斜通別館鑿溪水，補壁鍾山懸畫幅。天清石氣暗吹噓，坐覺南朝匿吟腹。仇侯醉面了公家，日聽歌呼換殺戮。園屋爲工程局附設俱樂部。

伯沆相過晚飲

諸緣了卻見真源，月滿階除對一尊。自愛圖書供寢饋，猶勝腰腳踏黃昏。亂餘士氣銷沈久，別後詩懷反復論。繫夢江南扶醉地，騎驢邀訪謝公墩。

月夜倚樓作

羣木夜蕭疏，新霜瓜地初。溪山爲破寐，星月欲同居。歌悵漁樵歇，樓完寇盜餘。一生鄰宿鳥，身世在空虛。

絮漪園爲海觀尚書故居過游感賦

絮漪園繫城北隅，名卉百本千柳株。往歲尚書巧穿築，亭館壯麗金陵無。尋常置酒極眺覽，煙橋萍沼浮鳧雛。欵冠落佩忘來徑，醉歌導燭驚栖烏。自逢巨變盜入室，壞拆屋壁搜金珠。經時爭奪事反覆，肉薄兵賊同一區。園中土石濺血處，燐火嘯聚如相屠。亂定我還縱幽步，艸光樹色猶縈紆。老去主人卧海角，不及扶杖飄髭鬚。時危家國復安在，莫立斜陽留畫圖。

月下憶

微霜千里映楓林，孤返溪廬聽暮砧。琴罷倚樓知念我，爲推海月滿吟襟。

漫興

錯比瀼西舊草堂，亂離帶甲莽相望。隔牆髡柳留殘葉，偷笑江南一夜霜。

傅梅根索題雲因集二絕

客游挾策浣衣塵，倦卧湘孺酒入唇。活國籌邊無一遂，剖心祇向夢中人。
燈火歌樓態萬方，我從劍底看雲郎。癡情俠骨人間世，博得狂吟涕數行。

若海至金陵過話偕觀觚庵園亭

故人樞具辭南海，又傍臺城數雁飛。霜日淒迷尋隱几，醉吟突兀撼虛幃。偶逢殘歲餘
情滿，攜看鄰園小水圍。一片晴山猶暝近，乍憐病骨不成歸。

登樓看落日

素輝赤氣散仍凝，千萬山如入定僧。乞取長繩誰得繫，樓頭縮手泣無能。

十四夜雲暗風起有雪意

空廬何所有，夜夜月相娛。坐視風雲改，兼移鼓角麤。雁聲哀欲滿，窗火冷逾孤。預

恐檐吹雪，呼僮滌酒壺。

晨興對雪

晚卧風猶怒，晨興雪果成。
啼空羣翅亂，孤望暗愁生。
氣合殘炊屋，陰垂列戟城。
閉門聽沸鼎，微答閣鈴聲。

雪中樓眺

望眼懸晴壑，移時雪點飄。
江城暗畫角，樓館近風條。
百里波光動，孤尊巷哭邀。
屐聲喧復寂，鴉影過蕭蕭。

雪樓望梁公約居室漫詠

小圃翻泥凍井昏，青青菘芥作行繁。
一牛鳴地梁居士，微雪鍾山照閉門。
歸來魂氣弄山靈，十日樓頭雜醉醒。
天遣老夫飛斷句，雪中留汝隔牆聽。

雪夜讀范肯堂詩集

雪窗寂衆籟，寒燈不肯憐。取誦肯堂詩，重接平生歡。汨汨寫胸腹，匯海迴濤瀾。神慮濯飢寒，聲歎虛空旋。誰言死無知，宛宛出我前。老至親故稀，況有深語傳。憂患棄一瞬，撫此歲月延。向怪古人癡，牙琴爲絕絃。

雪後訪伯沆圖書館不遇遂登掃葉樓作兼示惺悟上人

雪後微陰澹千里，穿踏荒街冷如水。過訪游侶庭無人，門前山色面蒼紫。履磴往登掃葉樓，湖江控帶巖巒洗。蔽天鵝鶴爲誰忙，旗翻萬屋笳聲裏。是日爲陽曆元旦。上人經營改架構，久歎澄觀始到此。扶窗破壁嵌玻璃，晨曦夜月收案几。別掃精廬亦虛曠，卧枕看山違尺咫。茗罷爲傷八指禪，老牽世法淪幽燕。未如上人跌鐵脚，手揮畫紙銷殘年。去折枯枝作藜杖，再過酌我還陽泉。還陽泉在山門下。

過龍蟠里顧石公故宅

依然巒岫擁陂池，照水槎枒禿柳枝。自隔春盤挑菜節，空逢雪屋煮茶時。酒狂今日關

元氣，國故何人輯逸詩。躑躅過門尋斷夢，跛驢騎出更看誰。石公出必以驢，然體肥重，不勝騎而死者數驢矣，當時輒用爲笑。

【校記】

〔何人〕《東方雜誌》(第十二卷第七號)作「無人」。

庭院有天竹兩株朱實纍纍撫而詠之

繁枝氣盡雪霜加，牆角偏垂四照花。有命違天終玩世，不關大索匿朱家。

爲乙盦題湯貞愍畫松

斐然儒將風，朋酒播詩窟。公金陵居，宅名詩窟。奇懷孕藝事，工夫成畫癖。興到掃蒼松，茲幅愈突兀。陰蔽牛犬卧，根護蛟蛇蟄。鐵榦烏銅皮，慘澹迴霰雪。魂氣與俱蟠，生平初不隔。去今六十年，誰謂公已沒。乙盦緘煩冤，靈光泣手迹。運盡國無人，何物繫一髮。張壁生濤聲，對語鬼神出。

小除日同仁先過太夷海藏樓看雪酌瓶釀

飛光雪壓檐，萬瓦白無縫。倚欄揖俊人，溼衣皮骨凍。餘興託奔車，互穿瓊瑤洞。儼然尋谷口，握手躋高棟。圍影水晶域，寒聲落雲空。側顧極荒陂，銀海沒枯葑。從知天地閉，千代納孤誦。鼠絕鵲拳枝，氈位曲身共。呵壁吐狂言，怪迂今不用。各餘杯中物，自澆陸沈痛。世逐歌呼盡，道以支離重。歲晏馱醉歸，街燈搖寸夢。

【校記】

〔水晶〕《東方雜誌》（第十二卷第八號）作「水精」。

雨中登惠中茗樓

驅車踏沮洳，訪舊愆促膝。旁睨倚江樓，就避飛雨急。層軒籠霄光，下唾萬家室。尺雪瞬已殘，棲瓦餘玉粒。澄川貫闐闐，首尾舟航集。彌漫海氣生，雲重雁行失。悲風揚市聲，酸雜羸癘泣。窮冬逼寒餓，滿路緣蟻蝨。大猾愈充斥，亂萌肯收拾。嗚呼偷活地，相斫行見及。老嬾迷所歸，亡命亦其一。茗椀對茫茫，穹昊鑒癡立。

偕濤園過乙盦晚歸飲市樓

歲闌衢巷昏寒雨，同車往尋居士語。窺簾隱几參楞伽，示疾維摩一教父。暫幸責言斷消息，猶獲促坐相嫗煦。零章銜袖字欹斜，重重帝網摹天女。更生賦《金光夢》，爲傷逝而作，居士和之，方屬草藁未定。修羅海出傷心句，亦有金光現初祖。多生流轉冬瓜印，普攝威音還淨土。野狐別具大願船，笑挽渴羌造酒所。一燈羈旅熟羊胛，莫問攢眉在何許。

甲寅除夕

歛逢四除夕，掌故海樓殘。曜靈擲大圓，雪痕髭髮滿。歲時變益劇，虎兇互蹂踐。傳烽照天根，種人蹙吹喘。安排俎上肉，近吻寧自免。篋中督亢圖，下取雷電卷。霧閣語不聞，嫉光迎婉變。二典載堯舜，博娛賈胡眼。逢人涕淚乾，抱蜀殉沈酒。昇霄隔墜溷，舐鼎說雞犬。几案把禿毫，看作萬金產。有身不媿恥，領兒噉肥臠。碎魂爆竹聲，老我法華轉。

【校記】

〔互〕《東方雜誌》第十二卷第八號作「巨」。

乙卯元旦先李道士見過

新晴爲我暖瓶枝，四壁吹香更醉誰。飽眼海雲成故舊，垂頭國論卜雄雌。忘年野服能排闥，生菜春盤看上匙。隔夕瀝肝銜袖紙，古愁祇許鳳凰飢。

更生示元日感懷之作次韻和酬

貫槎月窟紀曾經，頭白歸來忍獨醒。把酒光陰交履舄，生春魂氣滿池亭。乖龍掉海虛空震，瘡雁啼霄斷續聽。山鬼已傳知一歲，女蘿含睇晝冥冥。

麥孺博挽詞

中宵破夢了斯人，蜃氣纏雷作慘春。臨視闔棺如欲語，餘生抵几更誰親。溫溫常度藏憂患，耿耿微馨醉鬼神。一瞑知甘免奴虜，應憐坐待海揚塵。

正月廿五日止庵相國假乙盦齋作逸社第一集招蒿庵中丞庸

庵制府漚尹侍郎病山方伯入社同人咸賦詩

媛姝互提攜，散吟滿海甸。歷歷婆娑影，明滅隔霜霰。融風含柳梢，照樓有新燕。相公撫時物，坐覺負几硯。去住肯相妨，易幟獎高宴。爲招四老人，古之逸民選。譬彼潰圍軍，驍騰待鄰援。又如玄霄雲，脫壞續片片。終知羽翼成，霸圖獲再奠。晴晝居士廬，盆枝花欲徧。神光在襟裾，須眉眼中見。酒酣悲生腸，八極血仍濺。蝮蛇伺我側，吞噬逼寢薦。束手與偕亡，果驗儒術賤。雁影迷關山，雞聲靜庭院。留此歌泣地，聊許道不變。

【校記】

詩題中「乙盦齋」《東方雜誌》第十三卷第二號作「乙盦寓齋」。

答若海病起

幽居病起賦新詩，漠漠光陰窈窕思。已歎死生琴操絕，自分形影藥爐支。浮天鵝雁傳哀響，起陸龍蛇映一時。擁被閉關吾所羨，那堪滿眼海雲垂。

若海招集古渝軒寫句紀事因憶孺博會飲此樓曾幾何時遽爾

傷逝次和及之

手挽春風掃市塵，晴雲騎屋曉親襟。重來潦倒聞歌地，負盡伶俜後死心。玩世深杯傭
保伴，憑欄餘語夢魂尋。吾儕一醉關天運，忍對鶯鷓轉柳陰。

乙卯花朝逸社第二集蒿庵中丞邀酌酒樓用杜句分韻得縱字

時危躑躅將安之，偃隨輩行翻吟弄。沈廬瞬開第一社，促坐歡呼涎酒甕。俄頃有句吐
肝膈，閉抑百鳥奏鸞鳳。猶憐變雅易語言，謄寫十手博一痛。桃杏競發春光濃，糾飲花朝
古所用。蒿叟耆碩壇坫長，又倚市樓召徒衆。生平蓄抱券寸效，齟齬當世自矜重。束手大
事不可爲，拂衣旁睨壞梁棟。退衰述作詔來者，陰陽儒墨久穿綜。發爲文章裨家國，祇供
窮海拾斷夢。寫憂行吟存子遺，吾曹漫比蟲虻鬩。穹軸顛覆騰殺聲，幸保不死杯盤共。晝
晴風物況娛人，屋角柳萸綠無縫。行者居者各有適，稷契巢由待聚訟。仰天嘆喑掉臂還，
海蟾照席枯毫縱。

南潯鐵道初成由九江附車至南昌口占

十載摩挲縮地方，金根翠楯列成行。溪山處處逢頭白，一轉車輪一斷腸。

發南昌晚抵靖廬

車篋殉一途，晴泥陷如臼。冉冉破山光，衆象掬盈手。西嶺奔長蛇，舐雷昂其首。靈采挾飛魂，艸土氣逾厚。窺帷舊村落，日色澹井口。雨足田可犁，水牯繫初柳。帶溪十圍櫟，百過成老醜。對舞春風顛，併作雷霆吼。雜花明岡陂，肺腸餘中酒。咫尺存吾廬，寒松迷戶牖。跌坐生塵榻，哀思掃無帚。

清明日祭墓

一宵雷雨垂，晨仰天墨色。獰颯號空荒，篁葦互靡抑。牲醴列墓所，籲告兒在側。隔歲如隔世，活國計安出。黍離悲已沈，諸夏亡無日。預恐吞鯨鯢，匪獨持蚌鷸。宿昔綢繆意，事往誰復恤。到今五運盡，詭蕩毀天則。寸衷鬥羣嬉，憊歸留一息。山壓愁雲低，萬松

向霄直。銜紙寒雨中，飢鳥作行疾。

【校記】

〔門〕《小說月報》（第七卷第六號）作「闕」。

雨霽晴廬樓坐寓興

雨歇樓臺舊，峰邀嵐霧明。矮松滋石氣，叢竹寫春聲。沸野蛙成國，安窠鵲列營。滴殘游子淚，誓墓數平生。

疎疎小桃樹，猶綴兩三紅。香滅蜂何戀，風移燕自東。片山懸作鏡，新陌狹如弓。綽約深明閣，寒晴坐禿翁。

當門田水滿，拽鼻牧兒還。隔隴樵歌起，持杯吟思閒。層層鶯語樹，歷歷雉飛山。明滅牆頭字，曾留血點殷。

往歲泰和丞，謂陳芑潭。頻尋對曲肱。生哀翻短詠，死別負孤燈。煮茗供追憶，求田愧未能。一樓無量劫，我亦打包僧。

草風甦薄醉，金翠散茫茫。拂架開書帙，粘霄有雁行。歸攜亡國恨，就卧看雲牀。擊